

Бўлмаса



Тинчлик бўлмаса

Ислом адабиёти

17:28 / 03.12.2024 789

Сайёралар нотинч, уммонлар нотинч,

Магар ер юзида тинчлик бўлмаса.

Наслу насаб нотинч, замонлар нотинч,

Магар ер юзида тинчлик бўлмаса,

Не қилсин давраю дилда шодмонлик,

Барча қитъаларда қут, фаровонлик.

Қўшинда собитлик, элда омонлик,

Магар ер юзида тинчлик бўлмаса.

Кўнгилга сиққайми қўш сурнай саси?

Тиниб-тинчигайми тўплар наъраси?

Хотиржам тургайми тинчлик қалъаси?

Магар ер юзида тинчлик бўлмаса.

Чексиз само бўлмас тиниқ, беғубор,
Қўналға, маконсиз кезар кабутар.
Барча ерга бирдай келмагай баҳор,
Магар ер юзида тинчлик бўлмаса.

Мағриб нотинч бўлса, безовта машриқ,
Дўст-дўстдан имдодин тутмагай дариғ.
Қаер зулмат ичра, қаердир ёруғ,
Магар ер юзида тинчлик бўлмаса.

Элчилар кўнглида ғулғула мудом,
Хавфу хатар кезар қадам-бақадам.
Қай бир бегуноҳнинг кўзларида нам,
Магар ер юзида тинчлик бўлмаса.

Файз не қилсин боғу бўстон ичинда,
Тўй ўрнига аза достон ичинда.
«Қараб туриш йўқдир!» – фармон ичинда
Магар ер юзида тинчлик бўлмаса.

Тўра Сулаймон

«Ҳилол» журнали 4(61) сон

